

Visoki predstavnik u posjeti Beogradu

Visoki predstavnik, Wolfgang Petritsch, se danas, drugog dana svoje dvodnevne posjete Saveznoj Republici Jugoslaviji, sastao sa predsjednikom SRJ, Vojislavom Koštunicom, i premijerom Srbije, Zoranom Đinđićem. U središtu razgovora je bila provedba Daytonskog mirovnog sporazuma u Bosni i Hercegovini i intenzivirani pozitivni državni odnosi između BiH i SRJ. Visoki predstavnik se u nedjelju susreo sa ministrom vanjskih poslova SRJ, Goranom Svilanovićem.

Tokom navedenih sastanaka, Visoki predstavnik je informirao svoje sagovornike o pitanjima u vezi sa daljnjom provedbom Daytonskog mirovnog sporazuma, posebno o procesu ustavne reforme koji se trenutno odvija u bh. entitetima. Visoki predstavnik je istakao činjenicu da razgovori o ustavnoj reformi ulaze u svoju završnu fazu i naglasio je da politički lideri u BiH moraju pronaći rješenja koja ispunjavaju zahtjeve utvrđene odlukom Ustavnog suda Bosne i Hercegovine. Visoki predstavnik je zatražio podršku za "rješenja koja donose bh. vlasti". Predsjednik Koštunica se saglasio da će reforme učiniti bh. konstitutivne narode jednakopravnim u oba entiteta i "da se trebaju podsticati" i dodao je da se "nada da će se postići kompromis".

Visoki predstavnik je istakao činjenicu da će entitetska ustavna reforma ojačati proces povratka u oba entiteta. Pozvao je srbijanske i jugoslovenske organe vlasti da razmotre načine na koje oni mogu pružiti daljnju konkretnu pomoć bh. Srbima-izbjeglicama, koji trenutno žive u SRJ, kako bi se vratili u BiH. Ovo je pozitivno primljeno, a premijer Đinđić je rekao da će se izraditi pilot projekat koji bi pomogao da se Srbi vrate u dolinu Neretve.

Visoki predstavnik je tokom svih sastanaka ponovno istakao potrebu za saradnjom sa Tribunalom u Hagu, naglašavajući da je

SRJ, kao potpisnica Daytonskog mirovnog sporazuma, obavezna da osigura da oni koji su optuženi za ratne zločine izađu pred lice pravde. "Ovaj proces je od posebnog značaja za BiH, a i za cjelokupnu regiju", rekao je visoki predstavnik. "On će omogućiti pomirenje i osigurati da pojedinci više ne mogu kriti ličnu odgovornost iza jednog cjelokupnog naroda."

Visoki predstavnik je pozdravio intenzivirani pozitivni državni odnos koji se razvija između BiH i Jugoslavije. Kao primjer ovoga je naveo neminovnu ratifikaciju Sporazuma o slobodnoj trgovini između BiH i Jugoslavije, predstojeće sporazume o granici i dvojnem državljanstvu, te službene posjete predsjedavajućeg Vijeća ministara, Zlatka Lagumdžije, i sadašnju posjetu parlamentarne delegacije BiH Beogradu. Ovi događaji su od suštinske važnosti za unapređenje stabilnosti i ekonomskog prosperiteta u BiH i regiji, kao i za promoviranje "evropeizacije".

Visoki predstavnik se tokom svog boravka u Beogradu također susreo sa Žarkom Koračem, dopremijerom Srbije, i Dušanom Mihajlovićem, ministrom unutarnjih poslova Srbije, a u ponedjeljak ujutro se sastao sa građanskim liderima, koje je predvodila Sonja Biserko, direktor Helsinškog komiteta za ljudska prava sa sjedištem u Beogradu.